



Պարույր Սևակ

Հոգեբանություն թե ստուգաբանություն

Ծառե՛ր ու ծառե՛ր -

Ծառե՛ր հնացած,

Ծառե՛ր նորացած,

Նորակա՛զմ ծառեր,-

Եվ հողն է թվում

Քիչ առաջ հանգած հսկա վառարան:

Ով մանկությունից

Հազվագյուտ խոսքի որսորդ է դարձել,

Հիմա՝

Անտառում անխոս ման գալիս,

Մի՞թե մի վայրկյան չի կարող կարծել,

Թե շուտ է տալիս

Մի յուրատեսակ հսկա բառարան:

Բառեր ու բառեր -

Բառեր հնացած,

Բառեր նորացած,

Նորակազմ բառեր...

29.IV.1959թ.

Մոսկվա